

Inviato da **Michele Brocca**,  
sabaro 21.03.2020

### La peste del 2020 (che ne ga portà via i turisti)

*El tempo, se sa, tuto fa cambiar...  
ma chi lo gavarìa mai pensà  
che gera destin de sta sità  
che se tornasse a caminar?  
Prima no ghe gera na strada,  
na calle, un campo, un canton  
che no ti ciapavi un spenton,  
un pie schissà o na zainada!  
E se qualchedun barufava  
no serviva proprio a gnente  
parché qua ancora più gente  
el giorno drio ne rivava.  
E po', de boto, cossa xe nato?  
Na Venessia che no par vera!  
Come ai tempi de la guera!  
Ma cossa xe sto bruto fato?  
Xe rivà un virus impestà,  
che core par tuta la Tera,  
in casa tuti el ne sèra  
finché el gira par la sità.  
Desso le strade xe deserte,  
sensa onde xe i canali,  
i batei xe vodi come mai,  
e poche boteghe xe verte.  
La gente ga le mascherine  
e qualchidun anca i guanti,  
chi che se affida ai santi  
e chi che rompe le muzine...  
Pochi pol ancora lavorar,  
ciexe e alberghi xe serai,  
gnente foresti, né funerali;  
a casa i se ga da imbriagar!*

*Epur poco parlar se sente  
de dotori e infermieri,  
xe lori gli eroi veri,  
co tanta altra brava zente,  
che lavora, quasi stremada,  
in tuti i nostri ospeali  
che i xe strapieni de infetai  
da sta peste che par tornada.  
Ma co tute ste scene tristi  
mai la speranza ga da morir,  
e a malincuor me toca dir:  
"Sì, gera meglio i turisti!"*